

四庫全書

子部

欽定四庫全書

普濟方卷三百八

明 周王朱橚撰

諸蟲獸傷門

蜂螫

附論

夫蜂有大小故其螫人毒有輕重輕者或疼痛移時或經日而愈重者至悶絕偏身皆腫當亟用呪禁之術以取速効仍以消毒等藥塗傳之○蜂類甚多而方家不具顯其名唯地中大土蜂有毒一中人便即倒悶舉體

洪腫諸藥治之皆不能卒止舊方都無其法雖然不致殺人有禁術封唾亦頗微効又有瓠瓢蜂抑亦其次餘者猶善耳

方

雄黃麝香散

治竹中青蜂螫人方

右以雄黃麝香乾薑等分搗篩以射蔞和之著小竹筒帶之行急便用傳瘡兼治衆蛇虺毒如神

蜜脂煎

治蜂螫毒不出痛不定

白蜜

臘月猪脂

各兩  
匙許

雄黃

細研  
三錢

右先將蜜并脂煎沸傾在瓷盆中入雄黃攪轉通口  
旋飲之

蜜臘膏

治蜂螫方

猪脂

蜜

各五  
合

臘

二  
兩

右和煎如膏候冷以塗之一方和煎稍稍食之

蜂房膏

治蜂螫疼痛

蜂房

坐

蒼耳

各半  
兩

右為末用藍青汁調厚塗螫處一方無蒼耳

楮皮塗方

治蜂螫

用以楮皮生者取汁塗傳螫處

生硃散

治沙蜂叮

右以水磨生硃塗又磨雄黃塗

桑白皮塗方

治蜂螫

用桑根白皮生者搗取汁傳螫處

角灰散

治蜂螫

用牛角燒灰二兩為散苦酒調傳螫處斷葫指之

青蒿塗方

治蜂螫

用青蒿生者一兩細切搗研厚塗螫處

治蜂螫毒方

出千金方

用取瓦子磨其上唾二七遍置瓦子故處

治蜂螫

出千金方

用燒蜂房為末猪膏和塗之先煮蜂房洗

之又燒塗之

又方

出千金方

用酥脂塗之立愈又治豆蜂螫人

又方

出千金方

用燒牛屎灰苦酒和塗之

又方

出千金方

用以齒垢塗之又破蜘蛛塗之

又方

出千金方

用溲酢沃地取泥塗之

又方

出千金方

用嚼鹽塗之

又方

出千金方

用人尿新者洗之或以尿泥塗之一方用人

尿洗

又方

出千金方

用反手捻地上土傳之

治蜂蠆毒

出經驗良方

用野芋葉擦之如不便急以手就頭爬垢膩傳之或用鹽擦

治胡蜂叮

出百選方

用生薑汁塗又苦蕒汁塗之

治蜂螫

出德生堂方

用於地上尋小竹或木棒兒正南北安頓者取在手就寫十字先從南畫至北次從東畫至西然後於十字中心插一捻土傳在痛處立止屢曾用之治不可曉須至誠乃驗



治蜂螫

出肘後方

用芋葉梗汁傳之沈存中筆談云處士劉

易隱居王屋山嘗於齋中見大蜂為蛛網絲縛之蛛為蜂所螫墜地俄頃蛛鼓腹欲裂徐徐行入草嚙芋梗微破以瘡就嚙處磨之良久腹漸消輕躁如故自後人有為蜂螫者拔芋頭梗傳之則愈

治蜂螫

出十便良方

用薄荷按貼之瘥

又方

出朱氏集驗方

用蛇皮以蜜塗之炙令熱以貼螫處効又以醬汁塗

蛇皮熱封之甚妙

治蜂蠆螫人

用搗常思草絞取汁以洗瘡

又方用取屋雷下土水和傳之立愈

又方

出付後方

用破烏雞熱傳之

治蜂螫毒痛不可忍

用按藍青及搗莖實塗之

又方

出聖惠方

用蒼耳按取汁塗之

治蜂蠆

取蠮螋窠細研醋調塗之

治蜂叮

右以冬瓜葉搗傳之

治毒蜂螫

右取被螫人所居正東上着地草須是頭尾正東西者取中間五寸勿動散着頭灸點所傷處三點依舊着原取處勿亂却東西即瘥

孫真人云見一切毒螫之物不得起惡心向之亦不得殺之後必遭螫治亦難

蜘蛛蜈蚣傷

附論

凡蜘蛛蜈蚣所傷輕者焮腫疼痛甚則潰而成瘡自非

外以藥塗傳內以藥䟽導未易得愈

方

四神膏

治蜘蛛咬痛

皂莢 蕪荑 雄黃 青鹽

右等分為末和勻蜜調塗咬處頻易甚効

東葉散

治蜘蛛作瘡

東葉

栢葉

各五月五日採陰乾

生鐵衣

晚蚕沙

右各等分搗散以生麻油和如泥先灸咬處塗之瘡

棗栢膏

出聖惠方

治蜘蛛咬生瘡諸治不瘥

棗葉

栢葉

晚蚕沙

右等分搗為末以生油和如泥先灸咬處後用藥塗之良

蕪荑散

出聖惠方

治蜘蛛咬徧身成瘡立効方

白蕪荑

一分

皂莢

半挺

青鹽

半分

右為末鍊蜜和圓如皂莢子大每有傷著處用蜜調一圓傳在瘡上即効

雄黃膏

一名藍汁膏  
出聖惠方

治蜘蛛咬偏身成瘡及治蟲牙傷

咬

雄黃

一分

麝香

錢一

藍汁

一大  
蓋

右細研投於藍汁中以塗咬處立瘥若是毒蜘蛛咬  
即便細細服其藍汁神異之効

香油方

出千金方

治蜘蛛咬毒方

用人尿傳又油淀傳又炮薑貼之又猢猻屎傳之

黃臘方

出百選方

治蜈蚣毒蟲咬

用桑枝汁同鹽調擦痛處或用鎔黃臘滴患處肉赤  
為度一方以桑白皮搗傳之良

柳白散

出聖惠方

治蜘蛛咬作瘡諸治不瘥方

柳白皮

一兩

半夏

一兩

用並燒為灰細研以水調塗之

膩粉散

出聖惠方

治蜈蚣咬人方

膩粉

半兩

麝香

少許

右相和研勻生薑汁調塗咬處一方無麝香

地龍散

出聖惠方

治蜘蛛咬偏身成瘡立効方

用青葱葉一莖去尖頭作孔子以地龍一枚置葱葉

中緊捏兩頭勿令通氣動搖之俟為水塗之所傷便

瘡神驗

麝香散

出聖惠方

用棗葉一合入麝香末半錢麻油調塗之立効

葑根散

出聖惠方

用葑根一根去土入麝香一錢同研傳之

雄黃膏

治蜈蚣咬痛



用雄黃研細一分用桑根白皮自然汁調傳咬處

桑根散

出十便良方

治蜈蚣咬蒜汁塗方

用蒜洗切細研桑根白皮汁和塗咬處

胡粉散

出千金方

治蜘蛛咬毒方

用烏麻油和胡粉如泥塗上乾則易之

吳茱萸散

出百一選方

治蜈蚣傷

用爛嚼吳茱萸一味擦之立効一方用搗爛蝦蟇塗

之

雄黃散

出百一選方

用生薑汁調膩粉傳之其痛立止一方薑汁雄黃塗

貼亦良

薤白方

出聖惠方

治蜘蛛咬

用嚼薤白傳雄黃亦可遍身腫服藍汁

桑葉方

出經驗良方

治蜈蚣諸虫咬方

先用鞋底土擦之用大蒜桑葉罨於傷處如無用油  
豉罨傷處或藍塗罨傷處亦効麻鞋履底炙以措之

即瘥

巴莖膏

出經驗良方

治蜈蚣虫咬傷痛方

用爛研巴莖一粒猪脂膏少許調塗瘡口立愈一方用胭脂膏少許

白礬散

治蜘蛛並蜈蚣咬傷

用露筋草其根洗淨焙乾搗細為末用白礬水調貼

苦參散

治蜈蚣咬人痛不止

用頭垢膩和苦參末酒調傅之

椒蔥散

出聖惠方

治蜈蚣咬方

胡葱

一握搗如泥

椒合

用水煮椒汁洗之後封胡葱泥於咬處即瘥

治蜘蛛咬徧身成瘡立効方

出聖惠方

用井花水研硃砂塗之甚效

又方

出聖惠方

用蝙蝠糞生油研塗之

治蜘蛛咬作瘡諸治不瘥

出聖惠方

生油

少許

豉

一合

用先將油塗咬處即以豉搗作團拭之若見絲入豉

中即效

又方

出聖惠方

用蝦蟇頭炙令黃為末油調塗之立効

又方

出聖惠方

用鹽和油調塗之數揩之神驗

又方

出聖惠方

用獼猴糞為末油調塗之瘥人家養者不淨

不可用

又方

出聖惠方

用竹筒子長三寸許籠咬處煎釀漿水瀉於

筒中冷即易之以瘥為度仍取桃枝葉剉煮湯洗之

尤驗

又方

出聖惠方

用嚼續隨子傳之立瘥

又方

出聖惠方

用驢馬脚底鳧屎泥塗咬處不過三兩度瘥

治蜈蚣咬方

用蠟少許將筆管坐所咬處鎔蠟滴向管內令到瘡

上三四滴便止

羊乳散

出聖惠方

治蜘蛛咬人令徧身生絲及毒中人

用羊乳一味飲之愈正元十年崔負外從質云目擊

有人為蜘蛛所咬腹脹大如有娠徧體生絲其家棄之乞食於道後遇僧教飲羊乳未幾而平復矣此方妙

治蜘蛛咬徧身成瘡立效方

出聖惠方

用上好春酒任意飲之取醉使人翻轉身勿令一面卧恐酒毒入人腸胃須臾蜘蛛兒於瘡中小如粟米自出盡即瘥

雞冠血塗方

出聖惠方

治蜈蚣咬

用雄雞冠血塗之立止

附子膏

出聖惠方

治蜈蚣咬痛

用附子一枚生用去皮臍就沙盆內以醋少許磨濃少許塗之

治蜈蚣毒蟲咬

出廣南衛生方

用皂角於咬處上用艾灸之熱即去之無不効

治蜈蚣傷

出醫方集成

用大撚紙燈一箇濃蘸麻油點着了於咬處照燭之



毒氣自出盡入油烟中也

又方

出百一  
選方

用右手大指中指把地上於中指盡處拍少土傳之  
勿令患者知此亦厭勝法耳

又方

出百一  
選方

用菖蒲細嚼以傳咬處立愈

又方

出百一  
選方

用頭髮烟薰或燒灰擦傷處

又方

治蜈蚣咬法

蜈蚣有赤足黃  
足者螫人甚痛

用大蜘蛛一枚放所咬處令收其毒曾試用之既嚙

痛果即定蜘蛛雖着身稍遠必徑尋其處而嚙之漸覺腹脹蓋為毒氣所攻須投水中不爾即死一方云用冷水在傍如蜘蛛死即投水中救活易之以痛止為度甚妙兼治蠍螫尤佳

必効方

治蜘蛛咬着疼痛

用鹽豉炒乾為細末每用油調塗之必効

治蜈蚣蜘蛛毒用紅蚯蚓搗爛傅之立効

治蜈蚣毒

出百一選方

用鷄糞塗之一云烏白鷄屎水調塗之一用燒鷄糞  
用酒塗之一用醋

治蜘蛛咬

出十便良方

用雄黃末傳又徧身腫飲羊乳愈藍汁尤佳

治蜈蚣咬

出雁惠方

用蝸牛擦取汁滴入咬處

治蜘蛛咬瘡

用合歡皮葉並頭垢搗為末和鎗下墨生油調塗

治蜘蛛咬

用螞蟥燒末油和傳咬瘡上此物能食蜘蛛亦取其相伏也

治蜘蛛咬瘡

用蜂子燒末油和傳之按土蜂赤黑色此物能食蜘蛛

治蜘蛛咬用山豆根為末吐唾和塗之

治蜈蚣咬人痛不止

出十便良方

用嚼鹽沃土及以鹽湯浸瘡極妙其蜈蚣有赤足者

螫人黃足者痛甚一方治蜘蛛螫蜈蚣螫用鹽熱漬之

治蜈蚣螫人用蛇含草按傳之

治蜈蚣蜘蛛毒

出十便良方

用醋磨生鐵傳之

治蜘蛛咬作瘡

出聖惠方

用蘿摩草搗如泥封之日二三傳毒化作膿膿出頻

著勿停

又方

出肘後方

用羊桃葉搗傳之立愈

又方中蜈蚣毒

出十便良方

用蒜切作兩斷以揩之又以蒜摩地取泥塗之一方  
治蜈蚣咬痛不止用獨頭蒜摩螫處又嚼塗之立瘥

治蜈蚣螫人

用接藍汁以漬之即瘥蜈蚣不甚嚙人甚亦微殊輕  
於蜂當時小痛易歇脫為所中幸可以此療之藥皆  
用赤足者螫人乃痛於黃足者是其毒烈故也

又方 取屋中土以水和傅之

又方

用趕雄雞令走以雞背氣呵之數易雞立瘥

又方

用錫炙令熱以熨之不越十度即瘥

治蜈蚣蛇咬

出傳信  
適用方

用蜒蚰一條塗咬處痛立止一方去殼

治蜘蛛毒

出肘  
後方

用荊葉袋貯瘡腫上

又方

出肘  
後方

用射蔞塗腫上血出乃瘥

又方

出肘  
後方

用合口椒并葉搗傳之無不瘥

治蜘蛛咬作瘡諸治不瘥

用麪團咬處滴羊乳於上絲出即瘥

治蜘蛛毒

出肘後方

用切菜刀燒赤烙之

治蜈蚣咬

用刮指甲末貼即不痛

治蜘蛛咬

用久臭人溺於甕中浸所咬處仍以烏雞屎炒浸酒

服不然恐毒入

治蜘蛛瘡

用水韭根新者同雄黃研塗之

杏仁膏

治蜈蚣傷



右爛嚼杏仁傳之或以人屎汁傳尤良

治蜈蚣咬傷

宜山胡椒加鹽擦

又方治蜘蛛中人毒

右以汗垢擦之

又方汗垢加嫩楓葉擦

治中蜈蚣毒者用桑白皮汁鹽塗或搗蛄蟪塗之蜈蚣畏蛄蟪不敢過所行之路觸其身即蜈蚣死故取治蜈蚣毒也

治蜈蚣咬

以腐木末和醋傳之亦漬取汁傳咬處良

治中蜈蚣毒者

以烏雞屎水稠調塗咬處効大蒜塗之亦効

治蜘蛛咬

以赤翅蜂燒令黑和油塗之亦取蜂窠土醋和為泥

傳蜘蛛咬處當得絲出瘡

治蜘蛛蟲等咬

以鐵銹和蒜磨傳之

治蜘蛛咬

以黑驢之溺及乳以物盛之浸瘡或先用醋泔汁洗瘡然後再取驢尿處臭泥傳之亦佳一方無乳亦得

治蜘蛛咬

以生鐵鍛後飛淘去麤赤汁烘乾用蒜磨生油傳之治蜘蛛咬恐毒入內

用蔓菁末和油傳亦搗為末酒服蔓菁園中無蜘蛛是其相畏也

治龍龜咬瘡

以土蜂窠燒末麻油和傳之一方用醋和為泥傳之

解蜈蚣蛇蟲毒

用鹽按桑葉傳上

治蜘蛛蚤咬

取蘿摩子汁點瘡上

解蜘蛛毒

藍青麝香

少許

為末傳毒處

蠅蝮尿瘡

附論

凡蠅蝮蟲尿人影著處便令人病瘡其狀身中忽有處  
癢痛如芒刺亦如刺蟲所螫後起細痞癰作聚如茱萸  
子狀四邊赤中央有白膿如黍粟亦令人皮肉急舉身  
惡寒壯熱劇者連起竟腰脇胸治之法初得之磨犀角  
塗上止其毒治如火丹法余以武德中六月得此疾經  
五六日覺心悶不住以他法治不愈後有人教畫地作

蠹螋形以刀子細細盡取蠹螋土就中以唾和成泥塗之再塗即愈方知天下萬物相感莫曉其由矣

方

白礬方

療蠹螋尿

用雞子和白礬傳之浸淫為廣以大蒜磨研書墨塗之

赤小豆散

出千金方

治蠹螋尿瘡及諸惡瘡

用槐白皮半斤切以苦酒二升漬半日刮去瘡處以

洗日五六遍仍以赤小豆為末用苦酒和傳之燥復  
易小兒以水和一方醋二升浸半月洗之日五六度  
甘草傳方 治蠹螬尿瘡

用甘草一兩為末菲汁調傳之

鷄子膏

指出直指方

治蠹螬蟲又名八腳蟲隱於壁間以尿射

人遍體生瘡如湯火傷

用烏雞翎毛燒灰雞子白和塗之一方云麻油調傳  
雞食百虫故能治之或用燕糞水調傳或南向燕窠

自東取土末之新水調傳

治蠹螻尿方

出千金方

用殺羊髯燒灰臘月猪脂和封之

又方

出千金方

用搗豉封之

又方

出千金方

用酢和胡粉塗之一方猪膏塗之又燒

蒲灰傳之

治蠹螻尿瘡方

出千金方

用燒鹿角為末以苦酒和傳瘡上已有汁者燒道傍



散蒲席傳之一方醋調塗之一方油調塗之

又方

出千金方

用嚼大麥以傳之日三

又方

出千金方

用熟嚼梨葉以水和塗疼處燥復易之一方研爛傳

之一方以梨子汁傳之並瘡

又方

出千金方

用搗馬鞭草爛傳上燥復易之

又方

出千金方

用吳茱萸東行根下土酢和塗之

棟枝灰方

出肘後方

治蠹螬尿瘡及諸惡瘡

用棟木枝皮燒灰為末如瘡濕即乾傳瘡乾醋調傳之用和猪膏亦可

皂莢脂方

出聖惠方

治蠹螻尿瘡久不愈

用猪牙皂莢炙令脂出乘熱以脂塗之

治蠹螻毒

出海上名方

用猪牙皂莢炙令脂出用螟蛉窠水調塗之

治蠹螻尿瘡

出肘後方

用食盐三升水一斗煮取六升以綿浸湯淹瘡上

治蠅虻蟲溺人影亦隨所著作瘡

出肘後方

用雞腸草取汁傳之効一方生按傳三四度効

治蠅虻尿繞腰者 用煎敗漿汁塗之瘥

治蠅虻尿瘡繞身匝即死

出千金方

用燕巢中土猪脂苦酒和傳之土蜂窠水調傳亦佳

一方無酒

療蠅虻尿繞腰欲死

用敗蒲扇煮汁塗之

治蠅虻溺人影發瘡如熱沸而大繞腰匝不可療蠅虻

如小蜈蚣色青黑長足

用扁豆葉搗塗之即瘥

療蠹螋尿瘡  
用鵲巢中土以苦酒和傳之

療蠹螋尿瘡表裏相當一名浸淫瘡

用猪牙車骨年久者槌破燒令脂出及熱塗之

療蠹螋尿瘡習習然黃水出者

出聖惠方

用韭搗汁取塗之

又方

出聖惠方

用煮甘草湯洗之

又方

出聖  
惠方

用嚼桂塗之

又方

用絞馬屎汁洗之

又方

出聖  
惠方

用嚼麻子塗之

又方

用令患人於日裏立側近作沸湯微取以淋患人影

令當所患瘡處六七度仍遣人熟嚼蒜以嚙患人影

中患處口中餘蒜氣即真嚙患人瘡上愈

治蠅螫尿人成瘡初如粉粟漸大如豆更大如火烙漿

庖疼痛至甚

出肘後方

用草茶并汁茶俱可生油調傳瘡

上其痛藥至立止妙一方用燈盞內油調塗

又方

出聖惠方

用取衆人尿處爛泥塗之

治蠅螬尿方

出聖惠方

用白礬滴醋於銹生鐵上磨並鐵銹刮下塗之

治蠅螬瘡及諸惡瘡

以槐白皮醋浸半日洗之

治蠅螬蟲尿人影著處便令人體病瘡其狀如粟粒累累一聚礮痛身中忽有處燥痛如芒刺癢如刺蟲所

螫後細瘡癰作叢如茱萸子狀也四畔赤中央有白  
膿如黍粟亦令人皮急身惡寒壯熱極者連起竟腰  
脇胸也得之者以此法治之

以犀角磨塗之止

治蠅虻溺瘡

取磨刀石泥傅瘡有効

治蠅虻溺瘡

以故蓑衣結燒灰和油傅之佳

治蠅虻溺瘡

用猪膏葷碎傅之

治蠅虻叮

右用刀就地畫瘡又用刀裁至天面腳了取中間身上土津調塗

小豆末傳方

治蠅螬尿痛汁出

用小豆為末傳瘡上頻易之一方酒調塗之

射工中人

附論

夫江南有射工毒虫一名短狐一名蜮其蟲形如甲蟲外臺云正黑狀如大飛生有一長角在口前如弩檐臨其角端曲如上弩以氣為矢因水勢射人或聞其在水



中鈹鈹作聲要須得水沒其口便射人也此虫畏白鷺  
能食之其初得證候先惡寒噤瘳寒熱筋急仍似傷寒  
亦如中尸便不能語朝旦小蘊至夕輒劇寒熱悶亂此  
是其證始得三四日當急治之治之稍遲者七日皆死  
初未有瘡但惡寒噤瘳未成瘡似蠅螻尿亦似癰疽瘡  
射工中瘡有四種其一種瘡正黑如麋子皮周邊悉赤  
或衣犯之如有芒刺痛其一種作瘡久乃穿或晡間寒  
其一種如火灼燥起似此者最急數日殺人備急方云

有四種其一種突起如石瘰狀俱能殺人多令人寒熱  
屈伸張口閉目也○凡山水有毒虫人涉水中人似射  
工而無物其診法初得之惡寒微似頭痛目眵疼心中  
煩懊四肢振煇腰背百節皆強而兩膝痛或翕翕而熱  
但欲睡旦醒暮劇手足逆冷至肘膝二三日腹中生虫  
食人下部肛中有瘡不痛不癢令人不覺不急治過六  
七日下部出膿潰虫上食人五臟熱毒煩盛下利不禁  
八九日雖良醫不能治矣覺得之急早視其下部若有

瘡正赤如截肉者陽毒最急若瘡如鯉魚齒者為陰毒  
猶小緩要皆殺人不過二十日也欲知是中水與非者  
當作五六升湯以小蒜五升呋咀投湯中消息勿令大  
熟去滓以浴之是水毒身體當發赤斑無異者非也當

以他病治之

本草云水弩射工短狐等虫生於山水間含沙射人影而成疾或如瘡狀及如天行

病者名曰沙病今人謂沙子証然亦全非射工水弩之毒不過山嵐瘴氣感而成疾今以繩擦之所皆是太陽經脉所過之處則邪氣出而病愈矣江西袁州一河其間多生水弩彼人云其虫射人人中之即病却以綿揩身上或措着如針刺則以針挑去令血出其病即愈然彼人日食此水及於此浴緣此虫聞水動則射人彼中

人欲入此水則先以石打水動後  
方入水則其毒已射不能中人

方

五香散

出千金方

治江南毒氣惡核及射工中人暴生瘡

甲香

犀角

鱉甲

升麻

薰陸香

烏翬

丁香

沉香

黃連

青木香

羚羊角

黃芩

甘草

牡蠣

各四分

黃蘗

六分

吳茱萸

三分

右為細末中射工毒及諸毒皆水服方寸匕日三并

以水和少許洗之仍以雞子白和塗腫上乾則易一

方無青木香

犀角散

一方甲香散  
出聖惠方

治射工毒腫生瘡

犀角

鎊

甲香

射干

木香

乳香

丁香

黃連

升麻

鯨甲

醋炙去  
裙襖

牡蠣

羚羊角

甘草

炙  
剉

黃芩

去黑心  
各一兩

黃蘗

去粗  
皮

吳茱萸

湯洗晒乾  
各半兩

右除乳香研外搗為散和勻每服二錢水調下日三  
魚以雞子白調塗瘡毒良一方有薰陸香無乳香

野葛膏

出千金方

治射工惡核卒中惡毒方

野葛

升一

巴苳

烏頭

蜀椒

各五合

茵芋

躑躅

附子

丹砂

各一兩

雄黃

大黃

各七兩

右為細末以不中水猪膏三觔煎三上三下去滓內丹砂雄黃末攪至凝以棗核大摩痛上勿近眼凡合名膏皆毋令產婦女人小兒雞犬六畜見之惟宜清淨

治卒中射工水弩毒方 其毒有四種惟如灼人肉燂

起作瘡者此種最急凡射工並居毒地天大雨或逐人行潦流入人家而射人常宜養鵝鵝見即食人行將純白鵝以辟之白鴨亦善帶好生犀角佳也

治療射工毒方

出聖惠方

用以白梅皮裹鼓母虫吞至六七枚勿住取水浮起鼓母虫一枚置口中便瘡鼓母虫已死者亦浮起有毒應不可吞

治水毒中人

一名中溪一名中濕一名水病似射工而首無物

用小蒜三升咬咀於湯中莫令大熟即無力去滓適寒溫以浴若身體發赤斑者是也

升麻散

出千金方

治人忽中水毒手足指冷或至肘膝者方

吳茱萸

一觔

生薑

切一升半

犀角

升麻

橘皮

各二兩

烏梅

十四箇

右咬咀以水七升煮取二升分二服

治溪毒沙虱

用馬齒莧搗絞汁一升漸以傅瘡上佳



治中射工毒

用白鵝血飲之又以血塗之

桃葉方

治土俗療溪毒方

右初覺便取溪蒜煇蒼桃葉剉一斛蒸使遍熟出布  
席上解衣卧上厚覆衣被大汗良久出拭之勿見風  
則瘥已五六日恐毒入腹不可先爾應先服藥東間  
諸山有大木名埋檀枝葉上似梨冬不凋剥取白皮  
皮重疊如紙槌破煮服一斗日夜六七過無生者預  
取乾之亦單用蒨根白蘘荷根藍青汁並佳若卒無

根皮亦可單用藍汁煮服之亦可都合煮取汁漬之  
若患腹中痛恐轉成蠱噉人腹臟者取猪脂二升熬  
令燥水一斗絞取汁稍稍服之

雄黃朱砂方

出千金方

療溪毒

雄黃 朱砂

常山

各等分

右五月五日午時使童子搗合之取傅瘡上

巴豆方

出肘後方

治卒中射工水弩毒

右鼠婦蟲豉各七合巴豆三枚去心合猪脂但以此

藥塗之

升麻散

一名犀角散  
出千金方

治射工中人瘡有三種一種瘡正黑如

蠶子狀周徧悉赤如有刺痛一種作瘡經久乃穿晡  
間寒熱一種如火灼爍起者此最急數日殺人此病  
人寒熱方

犀角屑

二兩

川升麻

一兩

射干

一兩

右搗為散每服四錢以水一中盞煎至六分去滓不

計時候溫服

射干散

一名和氣散  
出聖惠方

治證同前

射干

川升麻

各二兩

右對以水三大盞煎至一盞去滓適寒溫盡服其滓

傳瘡上一方用烏扇根三兩

末

治射工及疰氣發無常處

用白芥子為丸服之或搗為末醋和塗之隨手有驗

中射工溪毒

以葱和鹽研傅之

犀角塗方

治射工毒

右以犀角不拘多少以水磨塗患處又取細末與麝香同研水調一錢服之

梅桃散

出千金方

治人忽中水毒手足指冷或至肘膝者方

右取梅若桃葉搗絞取汁三升許或乾以少水絞取汁飲之小兒不能飲以汁傳乳頭飲之

熊膽散

治水弩射人

用熊膽塗之更以雄黃同酒磨服之即愈

解毒散

出瑞竹堂方

治毒蛇射工沙虱等傷著人眼黑口噤

手足直強毒氣入腸腹服之效

白礬

研

甘草

各等分

右為末每服二錢冷水調下

皂莢膏

出肘後方

治射工傷人傳瘡

皂莢一挺長一尺二寸者推碎以醋一升煎如飴去

滓傳於瘡

又方

出聖惠方

用馬齒莧不拘多少爛搗取汁飲一盞又爛搗傳毒

上日四五易

治射工中人去毒方

出聖惠方

用胡葱不拘多少細切爛搗以搗瘡上灸十壯即瘥

一方云胡蒜

治射工中人寒熱或發瘡偏在一處有異於常者方

出千金方

金方

用鬼白葉一把漬苦酒中熟搗絞取汁服一升日三

或用醋

又方

出千金方

用吳茱萸莖葉一握斷去前後取握中熟搗以水二升煮取七合頓服一方用葫蘆切貼瘡上灸七壯

又方

出千金方

用蜈蚣大者一枚炙為末苦酒和以傅瘡上或用

醋以治口瘡

又方

出千金方

用赤莧菜熟搗絞取汁每服一升日四五服以滓傅



之

又方

出千金方

白雞屎取白頭者三枚錫和塗中毒處

治射工中人已有瘡者但惡寒噤瘳及其成瘡似蠅虻

尿亦似風疽

出千金方

用芥子爛搗勻酒和厚塗瘡上半日痛便止醋調亦

可

治人忽中水毒手足指冷或至肘膝者方

出千金方

用浮萍草曝乾為末酒浸服方寸匕

又方

出千金方

用搗蒼耳汁服一升又以綿裹杖沾汁導下部日三

瘥

又方

出千金方

用搗蓼一把以酒和絞取汁一升飲之不過三服瘥

外臺肘後作梨葉

又方

出千金方

用搗蓼一把以酒絞取汁以塗浴面目身體令徧

又方

出千金方

用搗蛇莓根為末水飲之并導下部生者用汁凡夏月行常多齋此藥屑入水以方寸匕投水上流無所畏又辟射工凡洗浴以少許投水盆中即無毒

治射工毒

用獨頭蒜切之厚三分以來貼瘡上灸之令熱氣射入即瘥

治水弩射人

出千金方

用臘月猪膏塗脚足拍間趺上及著鞋處蛭不敢著  
人一方和鹽塗之灸斷其道

治療中毒方

用大莓連根搗作屑服之亦可投水搗絞汁飲一二  
升并道下部生虫者夏月常行多齋此屑欲入水浴  
先以少屑投水上流便無所畏又辟射工家中雖以  
器盛水浴亦常以此屑投水中大佳

治溪毒每春月多得亦如京都傷寒之狀呼為溪瘟未

必皆是射工輩亦不盡患瘡痢但寒熱煩疼不解便死

用東向三禹步即以手左一攪取水將蒜一把熟搗以酒漬之去滓可飲三兩杯當吐得吐便瘥此方甚妙

治療溪毒

出肘後方

用五加根燒末以酒若漿服方寸匕

又方

用燒鮫魚皮以飲服方寸匕立瘥

又方

出肘後方

用荊葉搗汁飲之佳

又方

出肘後方

用搗漆姑以塗之腰背諸處漆姑生冬間細葉如蒜

狀

又方

用烏蒜一枚搗以酒和服半升得吐即瘥一名烏韭

山中甚多

療溪毒下部生瘡已決洞者

出肘後方

用伏米一升鹽五升一并作糜坐中即愈

又方

出肘後方

用桃葉艾葉搗熟以水漬之絞取濃汁去滓著盆中

坐有白虫出即瘥

又方

出肘後方

用鹽和皂莢末搗綿裹導之一方無鹽亦可

又方

出肘後方

用末牡丹屑以飲服方寸匕日三

治山中草木上石蛭著人則穿嚙肌肉行人肉中浸淫

墳起

出千金方

用灸斷其道即愈

治入山路草木中行

出千金方

用狼牙葉冬取根枝搗之令

熟傳所中處又飲汁四五合

治療溪毒及沙虱毒

出千金方

用大蒜十枚合皮安熱灰中炮令熱刀切斷頭以柱所著毒處盡十片復以艾灸瘡上七壯則良

又方

用蓼搗取汁服一二升又以塗周匝瘡

又方

用雄牛膝根一把搗水酒共一升漬絞取汁飲之日



三雄牛膝莖白紫色者是

治水弩子方

川烏頭

一兩半生炮  
半熟去皮臍

巴豆

一兩去皮  
心出油用

朱砂

半兩  
別研

右先將烏頭末後入二味再研用生薑自然汁煮麴糊丸如菉豆大以朱砂衣過熟水下三丸未轉再服  
治水弩子貼瘡方

蚌蛤

厚者一合  
燒為末

黃丹

一兩

麝香

一分

右同研細用油調塗瘡上以帛子蓋之

治溪毒射工

取溪鬼虫口邊角帶之其虫出於有溪毒處山林間  
亦名射工虫

治溪毒射工

以狄耳草絞取汁服滓傳瘡上血出

治溪毒沙虱水弩射工蝮短狐蝦鬚等病

用鶚鴉鳥至病人邊則能咬人身訖以物盛之當有

砂石出也亦可燒末及毛作灰服之

鵝鴟鳥如鴨眼大赤背斑山水

毒處即生此鳥也

此數病俱是山水間虫含沙射人影亦有

無水處患者夜卧常以手摩身體覺辣痛處熟視當

有赤點如鍼頭急捻之以芋葉入肉刮却視有細砂

石以蒜封瘡頭上不爾少即寒熱瘡漸深也其蝦鬚

瘡桂嶺獨多著者十活一二唯有早覺者當有芋草

及大芋甘蕉葉入肉鈎之深盡根蒜封可瘥須臾即

根入至骨其根拔出如蝦鬚亦有如丁腫最惡者生

人幽隱處自餘六病或如瘡及天行初著寒熱亦有瘡出者亦有無瘡者要當出得砂石

沙虱毒

附論

沙子病江南舊無今所在皆有之其證如傷寒頭痛嘔惡悶亂須臾能殺人多用麻繩擦頸及膊間出紫點則愈或用針膝後委中穴出血則愈山水間多有沙虱其虫甚細不可見人入水浴及汲水澡浴此虫在水中著人及陰雨日行草中即著人便鑽入皮裏其診法初得

之皮上正赤如小豆大黍米粟粒以手摩赤上痛如刺  
過三日之後令人百節強疼痛寒熱赤上發瘡此虫漸  
入至骨則殺人凡在山澗水澡浴畢熱以巾拭身中數  
過又以故帛拭之一過乃傅粉也今東間無不有此浴  
洗畢以巾拭燂燂如芒針刺熱看見處仍以竹葉細拂  
去比見嶺南人初有此者只以茅葉刮去乃小傷皮膚  
為佳仍數塗苦苣菜汁瘡已深者用針挑取得虫子正  
如疥虫者爪上映光方見行動也挑不得便就上灸三

四炷則虫死病除若止兩三處不能為害多處不可盡挑灸若猶覺惛惛是其毒大深便應依土俗作方術出之并作諸藥湯以浴皆得一二升沙出沙出都盡乃止若無方術痛飲番酒取醉亦佳如其無則依此方為療并雜用前中溪毒射工法急救七日中宜瘥不爾則仍變成溪毒如薤葉大長四五寸初著腹脇腫如刺破則雞搗之虫出食雞或三四數過取盡乃止魚須服麝香犀角護其內作此療之彼土有中之者不少呼此病為

蚬

呼故切

沙虫吳音名沙作盜護如鳥長尾盜者言此虫

能招呼溪氣東間山行無處不有其虫著人肉不痛不  
即覺者久久便生子在人皮中稍攻人則為癰山行宜  
竹管盛鹽數視體足見者以鹽塗之便脫雜少石灰尤  
良亦斷血而辟水溫又云所謂蜂蠆作於懷袖賁育為  
之驚恐言其小而有毒起乎不意也世人呼蠅蚬為蠆  
子而未嘗中人乃言不可螫人雷鳴乃放想亦當極有  
毒書家呼蠅蚬為守宮本草云守宮即是蜥蜴依如東

方朔云則兩種物矣今蜥蜴及蛇醫母並不螫人蜥蜴  
有五色具者亦云是龍不可殺之令人震死今又有小  
烏虫子尾有翅世人呼為甲虫而尾似車緩兩蠶尾後  
復言此虫是蠶未詳其正矣

方

麝香散

治沙虱

麝香

少許

辰砂

少許

右細研為末以鹽塗之瘥



羊脂膏

出千金方

治沙虱毒

麝香 大蒜

右合搗以羊脂和著小筒中帶行欲用取傅瘡上

如聖散

治療沙虱毒

右用少許麝香傅瘡上過五日不瘥當用巴豆湯服之一日輒以巴豆一枚二日則二枚計為數並去皮心以水三升煮取一升盡服之未瘥即更可作服之

治沙虱毒

出千金方

用斑猫二枚一枚熬為末服之一枚燒令烟絕為末  
著瘡中

又方

用白蒿草葉汁傳之瘰

治療沙虱

用鹽五合以水一斗煮一沸以漬洗瘡上

又方

若初著有赤點如米以鹽和麝香塗之瘰

治初中沙虱有赤點如米良久即如刺在肉中者

用竹葉刮之令血出仍斷大蒜摩之即瘥

治卒中沙虱毒

山水間多有沙虱其虫甚細略不可見人入水浴及  
汲水澡浴此虫在水中着人身及陰雨天行草中亦  
着人便鑽入皮裏

其診法初得之皮上正赤如小豆黍米粟粒以手摩  
赤上痛如刺三日之後令百節強疼痛寒熱赤上發

瘡此虫漸入至骨則殺人凡在山澗浴畢當以布拭身數遍又以故帛拭一度乃傳粉

治療沙虱毒

今東間水無不有此浴竟巾拭燂燂如芒針然刺熱看見處仍以竹葉杪挑去之比見嶺南人初有此者即以茅葉細細刮去及小傷皮膚為佳仍數塗苦荬菜汁佳

辟虱方

水銀

不拘多少

右以茶末拌在手心以津唾研和令不見星擦在綿帶子上繫於有虱處每一條帶約三箇月無虱

辟狗蚤方

韶腦

不拘多少

右以薄紙裹之放在枕邊或被下即無也

治虱咬

水磨朱砂傳雄黃醋磨塗

治諸溪毒沙虱

以白蘘荷煮汁服之

治沙虱毒

以射罔傳之佳

治溪沙虱

用搗蒜貼之熟醋浸之經年者良

治沙虱水弩

用蠅娘十枚端午日收乾者佳杵末油調傳之

辟蚊子

右用皂角蒼朮乾浮萍等分為末飯丸彈大令乾燒之

辟蚊辟虱狗蚤

右用駝糞白鱖魚骨為末燒之永無凡新屋未居先燒之直至屋壞亦無

普濟方卷三百八

欽定四庫全書

子部  
普濟方卷三百九

詳校官太醫院醫士臣程泰

編修臣倉聖脈覆勘

總校官進士臣楊懋珩

校對官中書臣金光悌

謄錄監生臣黃廷璧



欽定四庫全書

普濟方卷三百九

明周王朱橚撰

折傷門

總論

夫諸脈從肉諸筋從骨骨三百六十有五聯續纏固手  
所以能攝足所以能步凡厥運動罔不順從若乃倉卒  
之際墜墮倒仆折傷蹉跌患生不測詎可殫舉究圖療  
治小則消腫而舒攣大則接筋而續骨各有方劑存焉

凡從高墜下傷損腫痛凡墜墮傷損腫痛輕者在外塗  
傅可已重者在內當導瘀血養肌血宜察淺深以治之  
若傷損惡血不散脈者血之腑血行脈中貫於肉理環  
周一身因其肌體外固經隧內通乃能流注不失其常  
若因傷折內動經絡血行之道不得宣通瘀積不散則  
為腫為痛治宜除去惡瘀使氣血流通則可復完也傷  
折腹中瘀血者因高墜下倒仆顛撲氣血離經不得流  
散瘀在腹中速宜下之遲則日漸瘀滯使人枯燥色不

潤澤痿痺血瘕之病骨節損折肘臂腰膝出曰蹉跌須用法整頓歸元先用服麻藥使不知痛然後可用手

凡脚手各有六出曰四折骨手有六處出曰四折骨手  
脚亦三處出曰手掌根出曰其互交骨相鎖或出曰則  
是判出鎖骨之外須是搦骨相鎖骨不歸窠或出外則  
須搦入內或出內則須搦入外方歸窠曰若只用手拽  
斷難入窠十有八九成痼疾也手六出曰四折骨手臂  
出曰此骨上段是曰下段是杵四邊筋脈鎖定或出曰

亦對損筋所以出曰此骨須拽手直一人拽須用手把  
定此間骨搦教歸窠看骨出那邊用竹一片夾定一邊  
不用夾須在屈直出夾才服藥後不可放定或時又用  
拽屈拽直此處筋多喫藥後若不屈直則恐成疾日後  
曲直不得肩胛上出曰只是手骨出曰歸下身骨出曰  
歸上或出左或出右須用春杵一枚小凳一箇令患者  
立凳上用杵撐在下出曰之處或低用物墊起杵長則  
墊凳起令一人把住手尾拽去一人把住春杵令一人

抱住患人放身從上坐落骨節已歸窠矣神効若不用  
小凳則用兩小梯相對木棒穿從兩梯股中過用手把  
定木棒正稜在出曰腋下骨節蹉跌之處放身從上墜  
下骨節自然歸曰矣脚六出曰四折骨或脚拔上交肘  
處出曰用一人拽去自然手摸其骨節或骨突出在內  
用手止從此骨頭拽歸外或骨突向外須用力拽歸內  
則歸窠若只拽不用手整入窠內誤人成疾 脚大腿  
根出曰此處身上骨是曰脚根是杵或出前或出後須

用一人手把住患人身一人拽脚用手盡力搦歸窠或是剉開又可用軟綿繩從脚倒吊起用手整骨節從上墜下身直其骨便自歸窠背脊骨折法凡剉脊骨不可用手整項須用軟繩從脚吊起墜下身直其骨便自歸窠未直則歸窠須要墜下待其骨直歸窠然後用大桑皮一片放在背皮上杉皮兩三片安在桑皮上用軟物纏夾定莫令屈用藥治之脚手骨被壓碎者須麻藥與服或用刀割開甚者用剪去骨鋒便不衝破肉或有粉

碎骨者與去細骨免見膿血之禍然後用大片桑白皮以二十五味藥和調糊藥糊在桑白皮上莫令差錯三日一洗莫令臭穢用藥治之又切不可輕易自恃有藥便割剪便弄須要詳細審視當行則行尤宜仔細或頭上有傷或打破或刀傷骨碎用藥糊角縛不使傷風切須記之用藥治傷則用糊藥封角切須不可使風入乳腫其血自消散不攻瘡口 正骨金瘡須看脈候始知傷痛臟腑致命處一觀其脈虛促危矣傷處淺命脈虛

促亦為後慮傷至重命脈和緩永無慮也脈有虛實有  
去來有疎密或被傷臟脈不死者必關脈實重則勿慮  
或傷至死處其關脈無別脈洪大則難醫如用兩件藥  
後脈不轉動急急住藥若脈漸漸隨藥轉此則可治無  
慮或出血甚者脈不要洪大只要平正重實其血不曾  
出者亦無惡血在內者其脈洪大不要疎密亦不進退  
來去恐其變凶看傷脈每與內科脈不同或傷內或致  
命或難醫處被傷者命脈便已去矣此等切勿治之



顛撲傷損或被傷入肺者縱未即死二七難過左脇下傷透內者腸傷斷一半可醫全不可治小腹下傷內者證候繁多者脈不實重者老人左股壓碎者傷碎破陰子者血出盡者肩內耳後傷透於內者皆不必用藥

打顛及樹木壓徧身痛者打顛樹木壓或自高處顛下者此等傷皆驚四肢五臟必有惡血在內專怕惡心先用清心藥打血藥及通大小腸藥次第先服臨服童子小便入藥內立效專用大小腸泄利恐隘塞利害之甚

清心藥加前方通利大小腸藥服自然俱通無悶煩無惡血害心以次用止痛藥服之即止

接骨 附論

夫正骨續筋方法倂急非虞斷筋折骨之疼喁訛閃肭裨止相當覆塗之藥綿纏水溫淨息永通玄府開舒汗隙藥歸腫散痛消血脈旋流布週榮衛省身愛力以時中養氣痊平餘月而已

接骨手法

下頰骨脫落法

令人低坐用一手帕裹兩大拇指挿於病人口裏內  
外捏定大斗根往左布上下搖動令病人嚙唾一口  
往下送之入臼腮外用膏藥貼之再用一手帕往上  
兜之內服沒藥乳香散痛者黃耆散忌硬物十數日  
缺盆骨損折法

令病者正坐提起患人臍膊用手揣捏骨平正用乳  
香消毒散敷貼以軟絹掩如拳大兜於腋下上用一

薄板子長寸濶過半軟紙包裏按定止用鷹爪長帶  
子拴縛定七日換藥內服烏金散定痛疼腫破消後  
次伸舒起指以後骨可如舊

肩胛骨脫落法

令患人服烏頭散麻之仰臥地左肩脫落者用左脚  
登定右肩落者右脚登用軟絹如拳大抵於腋窩內  
用人脚登定掣病人手腕近肋用力倒身扯拽可再  
用手按其肩上用力往下推之如骨入臼用軟綿捲

如拳大覓於腋下用消毒散敷貼內服降聖丹痛者  
黃耆散三日一換藥定痛腫消換膏藥貼之常以伸  
舒起指演習如舊

臂膊骨傷折法

令患人正坐用手掣患人胳膊伸舒揣捏平正用消  
毒散敷貼外用薄板片紙裹之絹縛定內服接骨烏  
金散痛者乳香黃耆散二七日定可換藥依前扎縛  
痊可為妙

肱膊骨傷折法

令患人正坐用手按捏止依前法用藥扎縛凡病人手面於仰看可為妙

肋肢骨折損法

令患人服烏頭散麻之次用手按捏骨平正用乳香消毒散數貼服之導滯散并復元活血湯下之以利為度再用接骨烏金散降聖丹調治後用膏藥貼之以後骨可如舊

胯骨脫落法

令病人服烏頭散麻之仰卧倒看比兩腿膝蓋高者  
蹉在下也一手掣定脚腕右蹉在下往上動搖送之  
若蹉在上往下伸舒扯拽如骨入臼再用比雙脚根  
齊用走馬散貼內服降聖丹沒藥乳香散如疼定腫  
消用膏藥貼之後次演習行步

腿脛傷折法

令病人仰臥倒比根齊恐胯骨出曰用手掣病人膝

下一手掣脚腕伸舒扯拽脚根對齊如骨折處再用  
手按捏骨平正用消毒散敷貼外用長板子紙包裹  
絹帶子扎縛裏外用磚靠定勿令腿搖動脚頭抵正  
二七日方可換藥時輕手解開用葱椒湯軟絹搥洗  
再敷藥用銅匙柄穿帶子勿令腿動以後伸舒演習  
行步

膝曲蓋損破骨法

令病人正坐用一竹篾圈比膝蓋大小上用軟紙纏



圈如皮破者用玉真散敷貼破處并敷貼藥用紙篋  
圈絹帶子縛定內服烏金散黃耆散如不破者五七  
日一換如破者待瘡口成膿香油潤起用葱椒湯洗  
軟絹搥洗再用敷貼藥定疼痛腫消常以演習行步  
方得完全

臙肘骨傷折法

令病人正坐一手拏病人膝下一手拏腳腕用力伸  
舒扯拽捏骨平正如皮破者玉真散貼之上用敷貼

藥外用薄片紙色裏絹子扎縛過三五日待瘡口成  
膿香油潤起用葱椒湯搥洗上用生肌散并太乙膏  
貼之後扎縛留瘡口恐有膿血出內服烏金散加味  
通聖膝下軟衣羗之如太破者二七日一換藥用磚  
裏外靠定勿令腿動痊可為妙

破傷骨折法

如破傷折骨服烏頭散麻之如骨折簽出皮者用銅  
匙柄挑起皮皮披如舊用玉真散敷貼如骨折低者

往上擡之如骨折高者往下按之揣捏骨平正用油  
搽皮膚或蜜亦可用敷藥乾糝搥洗用生肌散并太  
乙膏貼之初服導滯散下之後服止痛祛風藥方并  
接骨藥托裏散調治如皮破骨折者髓血相混成膿  
接不正以後次演習行步終不得定完成全

脚腕蹉跌出臼法

令病人正坐倒一手掣病人脚腕一手掣脚大扯拽  
搖動按捏骨入臼平正用走馬散敷貼外用長片板

子絹帶縛於脚腕并小腿上恐脚不正用軟衣覓之  
內服降聖丹乳香散以後行步演習痊可為妙

用麻藥法

凡顛撲損傷骨肉疼痛整頓不得先用麻藥服待其不  
知痛處方可下手或服後麻不倒可服蔓陀羅花及草  
烏五錢用好酒調些少與服若其人如醉即不可加藥  
被傷有老有幼有無力有血出甚者此藥逐時相度入  
用不可過多亦有重者若已見麻不倒者又旋添些更

未倒又添酒調服少許已倒便住藥切不可過多

### 去惡血法

凡顛撲刀傷石傷諸般傷損至重者皆先服清心藥次服清小便藥三服去血藥被傷者血未結打從瘡口中出或結在內用藥打入大腸時即泄出或被打破顛破木壓惡血未積者用藥打散四肢或歸臟腑者或歸上膈者打從口中吐出或歸中膈打入大腸泄出先用此急救次服止痛藥即二十五味藥中加減用

用藥加減法

凡傷有淺深隨其吉凶用藥如折骨者則用後二十五味接骨方治之再加自然銅白芷乳香沒藥川芎各五錢立效若傷臟腑用清心藥加川芎當歸赤芍藥各二錢或肚腸傷破加白芷五錢同後清心藥服或被傷浮腫不通加皂角黃栢皮半兩入紫金皮散內傳之或頭破傷風亦用紫金皮散加皂角黃栢皮傳之立退或筋斷接骨者用二十五味加續斷半兩或諸處傷痛不止

者仍用二十五味加川芎五錢或惡血汚心不下用後  
清心藥加大黃枳殼五錢或氣觸痛加木通丁香藿香  
三錢同二十五味服之凡加減末者加末散者加散其  
餘只依本方不用加減孕婦癰撲傷損先用安胎藥後  
用二十五味接骨去草烏川芎餘依本方

又用藥加減方

凡損若不折骨不碎骨則不可用自然銅於藥內除去  
無痰涎不用半夏老人有傷者骨脈冷每加當歸川芎

川烏木香丁香人參五錢去白芍藥生地黃此亦二十  
五味內加減老人服此或傷臟腑者不問老少如有血  
并痰從口中出者清心藥加丁皮川芎半夏入二十五  
味內同服腿腫角血或皮冷加乾薑五錢入退腫藥內  
糊腫上腫及血自然退散或皮膚熱者加黃蘗皮皂角  
五錢入腫藥內角處自然退

用藥湯使法

凡藥皆憑湯使所使方先但用清心藥煎後用童便一



蓋同服或止痛重傷者則用薑湯燈心湯調二十五味藥服之薄荷湯亦可凡傷或刀傷及損內臟腑恐作煩惱悶崩血之患如折骨者用薑湯酒服接藥傅之如骨碎破重打重擗重木石壓者皆用先服湯使法末並用酒服如輕擗撲損傷則用薑酒調下二十五味藥立効凡碎進頸骨用手巾一條繩一莖繫在坊上垂下來以手巾兜縛額下於後腦穀縛接繩頭却以瓦罌一箇五六寸高看碎拌入淺深斟酌高低令患人端正坐於其

聖上令伸脚坐定醫用手揉擦平正說話不覺猝然以脚一踢踢去聖子如在左用手左邊掇出在右右邊掇出又一法令患人卧牀上以人捺其頭雙足踏兩肩即出

凡左右兩肩或顛墜失落若腦骨叉出在前可用布袋腕繫在前如出在後腕繫手在背後若在掇向右肘右出左肘骨即入接左摸右髻接右摸左髻

凡背上被打傷處帶黑單調肉桂末貼熱腫用一黃散

血不出內疼痛者乳香沒藥酒調一黃散貼却不破血藥

此手掙腕骨痕拗直拽出藥用手擡起手掙腕以患人手本身膝頭墊定醫用手於頸項肩處按下其骨還曰用藥敷貼若手腕失落或在上在下用手拽身伸却便手撚住方可貼藥夾縛若手掙骨出用大椅橫番向上醫用足踏定將病手在橫椅校曲入腕內以文書貼定平穩用絹兜縛兜時要手向上若手盤出曰不可牽伸

用衣服向下承住用手搏按入曰搖三次脚用夾縛下  
用襯夾凡手骨出向右則醫以右手拔入骨出向左則  
左拔之一伸一折搖動二三次凡手與脚骨皆有兩筋  
前一筋斷可治若皆斷不可治凡手足骨斷者中間一  
坐縛可帶緊兩頭放寬些庶氣血流陰又法腫若如截  
竹斷却要兩頭緊中間帶寬便益血氣聚斷處又手盤  
出向下將掌向上醫用手搏損動處將掌曲向外用夾  
向背一片長托在手背後向西面一片短在掌按處向

小指一片長在指曲處向大指一片短在高骨下三度  
縛去却貼藥凡兩手臂骨打斷有碎骨跌斷骨無碎骨  
凡手指打碎用油潤以薄笄撐管定看冷熱用一黃散  
或黑龍散貼之凡鬻骨損斷先用門扇一片於斜一頭  
令患人覆睡以手捍上下用三人拽伸醫以手按損處  
三時久却用貼藥病人渾身動作一宿至來日患處無  
痛却可自便左右番轉仍用通貼藥若前後不便聽其  
施溺更用內外住痛神授乳香散在後

凡臂腋左右跌出骨者右入左左入右用脚踏進如跌入內令患人盤脚按其肩頭用膝旅入雖大痛一時無妨却用貼藥從緩仰卧用手捺襯再加貼藥喫藥未可番卧大動後恐成損腰腿傷全用酒佐通氣血藥凡膀骨從臂上出者用三二人捉定腿拔伸仍以擦送入如在襠內出者則難整凡脚骨傷甚難整

凡兩腿左右或打或跌者多用葱打斷者不用薑葱以手法整其骨左上於前右於後以手拽正七分不拽五

分整定用貼藥後以松皮夾縛縛時先縛中坐後縛上下外用副夾竹繩若上下有腫痛無慮五日方可解外縛約一七方可轉動解外縛未可換藥仍渾用消服藥凡辨腿胯骨出以患人比並之如不粘膝便是出向內如粘膝不能開便是出身

凡脚盤出曰用人以脚從腿上踏一搬雙手一搏搖二次以藥夾凡膝蓋或左右損斷用手按直用貼藥夾一月若腫痛須用針刀去血却敷貼用夾或外脛踝骨

兀折左右脚盤用脚踏直或針患處却敷貼喫住痛藥  
不得令冷若膝骨跌出曰牽合不可大曲直則不見其  
骨積曲亦然可半直半曲以竹籬住以帛縛之

凡胷前跌出骨不得入令患人靠實處立用兩腿踏患  
人兩脚却以手於其肩掬起其胸脯其骨自入用藥封  
縛亦在隨機應變凡胸脯有拳搥傷外有腫內有痛外  
用貼藥內服化血藥如刀傷可用刀安骨定皮合口外  
用貼藥糝口內用喫藥



凡胃骨肋斷先用破血却用黃雲膏貼胸脅傷血作不通用生萊豆汁生薑自然汁和服以一壯力在後擠住自吐出其血也凡腸出可以病手搭在醫肩背隨其左右持起以熱油潤瘡口整入腸打噴嚏一箇却用桑白皮為線打曲針向皮內縫合後內用斷血合口藥固濟用絹袋縛定再貼絹上再縛若秋冬間有此證先用斷血合口後用狗子一隻割取狗口皮貼瘡口割候封藥聯口用若腹上有損針鼻大以燈火照之腸中有氣射

燈證不可治

又法腸出吊起病人手用醋煎山豆根汁服一口至二口却以針於病人頸上一刺腸自入凡腸上必有熱黑紫斑及有曲縫痕者以腸也如有膏一重黃一重肉更用胰子肉出也腸若出不割如實是膏不得入可割除須詳辨認凡拔伸捺上紙布絹軟物單正仍拔伸當近在骨損傷不得前去一節骨上仍拔伸相度左右骨有正拔者有斜拔者撐捺在手便法快要皮骨相就正

平整拔要相度難易或用一人二人已上彭氏口教骨者可用肥株去皮弦子膜以童便煮生薑一味打爛入飛羅麪加入前獨活八味打和用紙布絹片却用前正副夾須仔細整頓其骨緊縛後看上下腫痛消者方可換藥仍服住痛藥且貼了此肥株一番便如鐵鉗牢者宜斟酌日子看有無動作方可換藥

凡斷筋骨者先用手尋採傷處整頓其筋如前方貼藥及藥用正副夾正用杉皮副用竹片

凡骨斷皮破者不用良薑肉桂止用蔥汁調貼或損在內可用童便薑蔥生油和通藥服如通以過只用順血上氣藥餘血在腹作脹更進前藥無事一方用損藥仍看病人虛實若斷骨皮不破整其骨先用貼藥加良薑肉桂在貼藥內以蔥汁調塗

凡皮破骨差出爰拔伸不入搏捺皮相近三分用快剛刀割開此捺入骨不須割肉內自碎了以可入骨骨入用黑龍散傳貼瘡四旁腫處留瘡口用風流散填之若

不破用黑龍散敷貼之用風流破者用血出用力整時  
最要快便

凡骨碎看本處平正如何大抵骨低是不曾損左右骨  
高骨定損要拔伸捺平用藥敷貼束縛要平正捺了曲  
處時時曲轉便活處不强

凡敷貼用板子一片就板子上將皮紙或油單紙攤黑  
龍散在上移在損處皮肉有碎骨後來皮肉自爛碎骨  
自生若破斷皮肉用風流散填塗用線縫合用黑龍散

敷貼

凡腦骨傷碎輕輕用手搏捺平正若皮不破用黑龍散敷貼皮若破用風流散填塗瘡口用絹帛包不可見風著水恐成破傷風如水及風入腦成破傷風必發頭疼則難治急用玉真散貼服

凡腦骨傷碎在硬處可治若傷太陽穴不可治如在髮際須剃去髮用藥內入看皮破不破依上用藥服或填若欲洗只可用熟油洗髓出多用腦麝末掩

凡腦及兩角後摺或兩眉有傷可治眼睛傷不突瞳人不碎可治頭頂心有損傷難治

搓衮舒筋法道人詹志水者信州人初應募為卒隸鎮江馬軍二十二歲因習驍騎墜馬右脛折為三困頓欲絕軍帥命舁歸營醫救鑿出敗骨半年稍愈扶杖緩行骨空處皆生獨脚生筋攣縮不能伸既落軍籍淪於乞丐經三年遇朱道亦舊在轅門問曰汝傷未復初何不醫救對曰窮無一文豈能辦此朱曰正不費錢但得大

竹管長尺許鑽一竅繫以繩掛于腰間每坐則置地上  
逢足搓衮之勿計工程久當有效詹用其說兩日便覺  
骨髓寬暢試猛伸足與日差遠不越兩月病筋悉舒與  
墜時等又頃見丁子章以病足卒故作轉軸脚踏用之  
其理正同不若此為簡便無力者立可辦也

方

紫金丹 治打傷損骨折

川烏

炮

草烏

炮各一兩

五靈脂

木鼈子

去殼

骨



碎補 威靈仙 金毛狗脊 自然銅醋淬七遍 防

風各五 地龍去土 烏藥 青皮去穢 陳皮去白

茴香各半 乳香 沒藥 紅娘子 麝香

黑牽牛各半 餘糧石微炒

右為細末醋麪糊丸梧桐子大每服十九至二十九  
溫酒送下病在上食後服病在下食前服

接骨丹

乳香 沒藥 川椒 半兩錢五文醋煨七次 白芷

馬蘭花

川烏

自然銅

醋煨七次

白膠香

廣木

香

當歸

赤芍藥

草烏

蜜陀僧

川芎

紅豆

右除半兩錢外其餘藥各二兩半為細末合勻用好酒打麪糊丸如彈子大每服作一百丸搗碎好酒化開喫了再喫酒數盃須令護病如患傷處良久藥性行病人驚勿令轉動其骨響時是自正矣此藥有力打撲跌折腿食後服在下食前服如不折者服半丸

敷貼藥

自然銅

火煨黃  
了醋淬

生地黃

木鼈子

去殼并  
醋浸

川

當歸

赤小豆

骨碎補

去毛

荊芥

蘇木

蒼

木

草烏

接骨草

續斷

烏藥

沒藥

隨意

加

川烏

右為末米粉并黃子醋熬成膏子敷貼痛處外用杉木板夾定損處

接骨火龍丹

治一切打撲傷損骨碎筋痛腫脹者

降真香

蘇木

各半兩

自然銅

半兩火煨

沒藥

七錢

乳香

川烏

草烏

龍骨

虎骨

各半兩

全蝎

四錢

血竭

半兩

骨碎補

七錢

水蛭

四錢去毛

地龍

四錢

右為末醋糊丸如梧桐子大或萊豆大朱砂為衣每服五七丸溫酒下

接骨神効方

百合

白斂

白芨

乳香

沒藥

赤小豆

甜瓜子

自然銅

糯米

白芷

血餘

灰

赤

芍藥

各一兩

川烏

草烏

各五錢

右為細末好酒調一錢服後骨折處聽之有聲不過

三服止

草烏散

一名麻藥方出危氏方

凡傷損骨節不歸臼者此藥服

之麻不知痛然後用手整骨

豬牙皂角

木鼈子

紫金皮

白芷

半夏

烏藥

川芎

杜當歸

川烏

各五錢

舶上茴香

坐挈

酒煎熱

草烏

各一兩

木香

三錢

右並無煨製為末每服二錢好紅酒調下若傷重刺  
痛手近不得者更加坐拏薑薑陀羅花各五錢入藥  
即倒不知痛處然後或用刀割或用剪以去骨鋒用  
手整頓骨節歸元端正用夾夾定任從醫治其或箭  
鏃入骨不能得出亦可用此麻之任從用鉗拽或鑿  
開取出後用鹽湯水與服立醒

金絲接骨丹

水蛭

炒去烟盡

自然銅

燒細醋淬七次

當歸

去蘆

沒藥

無名異

南乳香

已上各三錢

透羅綿

燒灰三錢

血餘

頭首男鬚  
燒灰三錢

蒼朮

九錢  
去皮

五靈脂

九錢

草烏頭

九錢

半

半兩錢

五文燒紅  
醋淬七次

右為細末醋糊為丸如小彈子大每服一九溫酒化  
開再用溫酒一大盞按之疼痛立止自然接上大有  
神効如合藥時綿裹藥磁器內盛於藥乾時搥碎一  
丸溫酒化下後再用溫酒投之

接骨神應丹

水蛭乾瓦上焙一錢

沒藥一錢

乳香一錢

木鼈子去殼一油

箇

藿香一錢

木香一錢

附子炮二錢

半兩錢三

醋淬  
七次

草烏半錢

綿子灰二錢

自然銅二錢

五  
次

孩兒胎頭髮一箇

右為細末每服二錢溫酒調服隨病上下服効

接骨丹出濟生  
拔萃方

金半兩錢一  
一文燒紅醋淬  
如無古老錢代

木當歸  
藿香葉各一

錢  
血竭一錢

水蛭三錢同糯米  
炒紫色為度

綿二錢  
燒灰  
大



虎骨

一錢  
酥炙

木香乳

麝香

沒藥

各一錢

血餘

二錢  
微焦即孩  
兒胎頭髮也

右為細末另裹若損折甚者每服三錢輕者每服二錢半如無損折除蛭錢服藥時令病人先飲好酒三五盞服後更飲三三盞次用紙裹以繩穿板子縛之

當歸丸

出百一  
選方

接骨定痛

當歸

赤芍藥

川椒

去目及  
開口者

敗龜殼

千金

藤骨碎補

川芎

並生  
用

乳香

別研

虎骨

慢火  
炮黃

沒藥

研

自然銅

火煨通紅  
醋淬三次

右等分為細末煉好黃蠟丸如彈子大每服一九筋  
傷骨折用無灰酒半升入藥以東南柳枝攪勻同煎  
三五次空心熱服五十歲已上不過十服旬日如舊  
五十已下不過五服秘方

接骨膏 治癱折手足魚治疼痛

官桂

沒藥

乾薑

龍骨

已上各  
一兩

白芷

川

山甲

已上各  
二錢

乳香

接骨草

不拘  
多少

酒

二  
碗

肥

角

七十二箇搗碎取汁五碗

醋

二碗

右除沒藥乳香另研為細末外餘藥同為末將醋肥  
角同煮文武火煎三遍文武火謂候滾去火少停再  
燃候心滾又去火如是三遍方下衆藥或應掩貼患  
處如燥則用薑汁和酒掀起膏爛內再貼再潤膏外  
自然銅散

出醫方大成

治打撲折骨損斷

乳香

沒藥

蘇木

降真香

川烏

去皮尖

松

明節

各一兩

地龍

去土青油炒半兩

真血竭

三錢

龍骨

生用  
半兩

自然銅  
火煨米醋  
淬一兩

土狗  
十枚油浸焙為  
末本草名螻蛄

右為末每服五錢用無灰酒調下如病在上食後服  
病在下空心服服之覺藥自頂心尋病至下兩手再  
週遍身下兩足遇病處則颯颯有聲患人自覺藥力  
習習往來其家重誓不許傳授後以說死報恩遂廣  
好生之心博傳累試無不神効一方加水蛭半兩油  
炒

接骨丹

出德  
生堂

接骨不問骨節疼痛

當歸酒浸 黃耆 赤芍藥 牛膝 肉桂 白芷

各一兩半 紫金皮四兩童子小便浸 川烏一兩炮淨 乳香

沒藥各半兩別研三錢醋淬

右為細末酒糊為丸如桐子大每服二十五丸量虛實加減酒下病上食後服病下空心服

接骨忌拐丸 定痛如神

乳香研 沒藥研 虎脰骨醋炙 當歸 川烏

去目 川芎極大者 敗龜殼酒蘸炙黃 赤芍藥 崔李

根取自然銅醋淬

右各三錢為細末，鎔黃蠟約度多少，丸如彈子大，每服一丸，用好酒一盞，銀石器煎，以東南柳枝攪散，熱服。骨碎者服一丸些小，閃肭服半丸。

### 接骨丹

何首烏半觔 大附子一箇炮去皮臍 乳香 沒藥 木

香當歸焙各三兩 甘草三兩一半生炒一半生 五靈脂五兩

自然銅二兩醋淬 川烏頭五箇生三箇熟二箇

右用好黃蠟四兩鎔開前藥末和丸每觔作十六丸  
每一丸溫酒下

整骨定痛散

天花粉

一觔炒

甘草

二兩半炒

沒藥

木香

一兩

當

歸

一兩半

乳香

一兩半

陳皮

二兩半

血竭

一兩半

大附子

一箇炮去皮臍

右為細末每服五錢熱酒調服敷貼亦可

接骨沒藥散

治打撲傷損疼痛折骨碎者

川獨活

川牛膝

酒浸

川續斷

杜仲

草薢

防風

去蘆

甘草

各等分

乳香

沒藥

各半兩另碾

右為末每服三錢溫酒調下

沒藥散

治傷折筋骨痛

沒藥

研

虎骨

酒浸炙

當歸

切焙

白芷

敗龜

酒炙

各半兩

補骨脂

自然銅

火燒醋浸七次

麒麟竭

研各一分

炭

內實者火燒一次酒淬取二分

右為細末每服一錢溫酒調下不計時



內托散

當歸

半兩

熟地黄

并酒浸

木鼈子

川芎

草烏

芍藥

細辛

各一兩

自然銅

火煨為末

醋淬二錢

右為末酒煮糊為丸如彈子大每服三十九溫酒下

無時一半末木瓜酒調下

敗龜散

治折傷定痛接骨

敗龜

醋炙去屑重一兩

沒藥

研

桂皮

去麤皮

自然銅

醋煨

碎七遍研

當歸

焙切

骨碎補

去皮炒

白芷

防風

去叉

各半  
兩

右為散每服二錢溫酒調下不拘時日二

米殼散

米殼錢三 當歸 乳香 沒藥 血竭 甘草

川芎已上各一錢半 半兩錢火燒七次醋淬一箇

右為粗末每服三錢用好酒一大盞煎至七分去滓

溫服

接骨散 并治惡瘡

金絲水蛭

半錢每箇三截瓦上去氣透為度

沒藥

三錢研細

銅錢

用半兩者取三文或五文燒紅醋淬細末

金頭蜈蚣

一箇

金色自然

銅

半兩燒紅醋淬研為細末用之

乳香

一錢研為細末用之

右為細末以津調半錢塗患處止痛如出膿先用粗藥末少許油少半匙同研勻再入少半匙再勻又入前藥接骨散半錢用銀釵子打成膏以雞翎掃在瘡處痛立止天明一宿自破如打折骨頭并損傷可用接骨散五分加馬兜鈴末五分酒一大盞熱調連

滓溫服之立即定疼如不折立止疼痛以食前後藥  
又外用後藥貼一方無沒藥

接骨藥

陳爛麻根

兩把

羊耳朶

一對

亂絲

一握多者更妙

右取肥松節劈碎約量多少先放三兩根新瓦上以  
藥同在上燒存性研為末如生再燒研更加五靈脂  
半兩如疼入乳香少許和藥如茶褐色為度用布條  
子約纏一遭先攤小黃米粥勻上撒末勻纏定折處

上又用帛三五重上又用竹簞子纏勒緊慢得中約  
二日換上一次再後五日換一次又七日換上一次  
如此無不接者

### 接骨丹

半夏

二兩

南星

四兩

木鼈子

一兩

燒去皮

紅豆

半兩

沒藥

自然銅

炒各一兩

右為細末生薑汁四兩同醋打麪糊二錢塗處俾正  
綿裹之溫熱令汗孔開而藥力入

接骨傳藥

牛皮膠

生薑自然汁

各二十  
文重

先將生薑自然汁入銚內火頓熱入膠在汁內鎔開打令勻如稀糊入沒藥

白芨

白薇

草烏頭

官桂

各二十  
文重

右為細末同入前藥汁內打勻先用葱湯洗患處却傳藥用綿帛扎定如覺熱行則藥効

硃砂膏

治癰撲刀傷接骨

臘月豬脂五兩

黃蠟半斤已上洗煎

鈎丹羅

自然銅

研四兩

蜜陀僧

研四兩

硃砂研

右用新鐺鼎先鎔脂次下蠟停冷再下蜜陀僧鈎丹硃砂自然銅緩火仍煎入水中不散取出鼎放冷處用柳篦攪勻瀉入瓷器內不住手攪至凝丸如彈子大且用筭皮之類襯之極冷方收凡傷碎骨者大石壓碎骨者先用此藥化開然後夾定用此藥服之須作小丸如梧桐子大每服十九葱酒送下或傷損

深者撚成條子入孔中淺者用油單紙貼之甚者甃  
裏木夾之如藥方散再覺病痛更一服痛即止又痛  
甚者貼之即止

赤芍藥丸 治打傷筋骨或閃肭或傷損折疼痛不可

忍

芍藥

一兩用赤的

好乳香

半錢

接骨木

半兩乃蒴藿也

川

當歸

一兩

川芎

自然銅

各一兩

右為末用黃蠟四兩鎔入前藥末攪令勻候溫軟衆



手丸龍眼大每服一丸以好無灰酒一盞浸開服之  
痛絕便止若大傷碎折先整骨用後藥貼了然後用  
此藥表裏兩攻無不效也此後一方是一副不可分  
開

治打破傷損接骨方

川烏 草烏

各一兩

右為末用薑汁調作掩子貼損處又將綿縛定良

黑豆散 治傷疼痛

雄黑豆一兩

桑條東枝剉碎一兩

栗剉碎一兩以醋

拌醋拌於瓮器炒存性

右搗碎為散每服三錢熱酒調連進三服後用八骨

散

八骨散 治筋骨損折

虎骨

炙醋

龍骨

研碎

牛骨

雞骨

炙

狗骨

炙

兔骨

炙

豬骨

炙

羊骨

炙

楓脂香

研

自然

銅

火燒醋淬  
二七次

右各等分搗研為散每有傷處糝藥在瘡上用黃米粥勻攤帛上裹瘡口用帛裹輕繩縛之

### 接骨散

米殼

一兩去頂  
蜜炒黃色

麻黃

一兩

乳香

一錢半

當歸

一錢

半

甘草

芍藥

各三錢半

右為細末酒煎熬至七分和滓溫服病上食後病下食前

### 接骨方

好綿灰

無油頭髮灰

各一錢

乳香

一錢

木鼈子

去殼去油一錢

麝香

少許

南水蛭

不用糯米於瓦上炒黃為度

右為末作一服好酒下驗病上下服之能飲酒者大醉亦可只一服不許二服

雞鳴散

治內外癱傷損骨

當歸鬚

赤芍藥

大黃

各五錢

降真

蘇木

甘草

只少許

右咬咀水二盞煎七分去滓食前溫服加小便

治打撲傷損接骨方

川烏 草烏 白殭蠶 半夏 南星 桂皮去粗

右各等分為末取生薑自然汁并釀醋各半調藥稀稠得所就綿上攤勻裹痛處如乾再將醋并薑汁澀如藥落再換或傷損甚者用藥了以杉木板夾定此藥用後止痛然後服藥

當歸

去蘆煨乾稱

乳香

細研

右各等分為末每服二三錢酒調下

接骨知母方 治筋骨傷折

知母

焙

貝母

去心

白芨

白薇

桂

去粗皮

乳

香

研各半兩

右為細末用好酒調如糊攤藥在新帛子上裹所傷處三五日一換

接骨烏金散

半兩錢

一百足醋淬碎

錦文水蛭

半兩炒烟盡水使不利

南乳

香

一錢另研

麝香

一錢

自然銅

醋淬研半兩

右為細末每服半錢自然汁生薑溫酒少許同服之  
如損在腰上食後服之腰下食前服如筋骨無傷藥  
即吐出無忌一方有沒藥

烏金散 治骨接

水蛭炒一兩

自然銅

三兩碎研內將一兩生用一兩炒

水竹青

半兩炒灰

硝黃半兩二味同燒灰

乳香三錢

右為末每服一錢或半錢小兒一字入麝少許熱酒  
送下

神效點金丹 即筋骨藥

蒼朮 紅麴末 香附子 白芷 草烏

各一兩

右為末水糊為丸如雞頭大每服五丸用酒或茶鹽送下不可多服恐麻人

接骨服藥

蘇枋

松節

黑角節者各半兩

自然銅

乾鍋內煨

沒藥

乳香

滴乳香各一錢

右各細末和勻每服二錢無灰酒下服罷使用刷牙



子灌漱恐刺若骨損甚者先以木夾定次服藥一服  
止痛二服骨有聲三服完如入臼

接骨敷貼藥

出濟生拔萃方

天南星

四兩

木鼈子

三兩

沒藥

半兩

官桂

一兩

乳

香

半兩

右為細末生薑一斤去皮取自然汁入米醋少許白

麪為糊同調攤紙上貼傷處以綿繫之用篋子篋住

麻索子纏

五仙丸

出聖濟  
總錄

治傷折筋骨

自然銅

四兩火燒  
醋淬二次

大栗

一百枚去  
皮生用

黑豆

一升  
湯浸

去  
皮

白桑柴灰

二升

接骨木灰

一升

右一處大臼內搗一千下取細入煉蜜再搗丸彈子  
大每服一九溫酒嚙下不拘時服

接骨敷貼方

以石楠葉碾為末用大活鯽魚一箇從脊破開去盡  
粗骨滿裝楠末於內濕紙裏煨熟去紙將魚帶藥熟

貼於損處用直性木夾定扎縛隨即接之

接骨藥

出儒門  
事親書

半兩錢

醋煎燒  
碎為末

麝香

許少

自然銅

各一錢

右為極細末如在上食後服如在下食前服三罈頭  
嚼丁香一枚乳香一粒無灰酒一小盞如不折其藥  
反出罷其痛不可忍勿凝待一日如骨未接再服如  
前老者十餘日少者不過五七日

治骨折傷損法方

活蝦蟆

一箇

活鯽魚

一箇

杜牛膝根

洗淨

小粉

炒焦

黃

右搗爛下小粉和成如泥患處用一層護之後搽前藥夾板縛夾定仍服諸藥

定痛一字散

何首烏

草烏

各二兩

乳香

沒藥

各一兩

右為末每一字鹽酒調日進二服

筋骨藥

草烏一兩 蒼朮五兩 青皮 白芷各二兩

右為末麪糊丸如鷄頭大每服三九溫酒送下

走馬散出醫方大成 治接骨定痛

詩曰 青栢乾荷葉 此藥最為強 皂角并碎補 止痛絕為良

栢葉生少許 荷葉生 皂葉生多用或肥皂 骨碎補去毛

右各一兩為末於跌處揣定骨入元以杉木板子量大小以紙襯於杉內生薑調藥如糊攤就紙上貼骨斷處以繩縛定夾外更以熟絹纏之莫令骨動三日

或七日開看以葱湯洗不可令水大熱若無動再貼藥復夾七日除七日換藥貼如痛甚加沒藥少許貼一方有白及

接骨禁聲膏

肉桂

不見火為末

牛皮膠

截碎

馬屁勃

擦末

獨核肥

皂

右用生薑自然汁添少水煎膠化搗之却入馬屁勃肥皂搗為稀膏離火畧溫入桂在內再搗細攤紙上

須用紙背貼患處不用藥貼痛甚者熱貼微痛者溫貼上用油紙包貼外用帛縛第二三日取下刮舊藥貼生薑汁熬熱再貼如此二三次平復皮上必有生熱瘡用薄荷甘草白及為末調傳

接骨丹

出衛生家寶方

治筋骨折損

自然銅

生用別研

川棟子

剉碎

黑牽牛

炒

川烏頭

生用各等分

右為末酒糊丸如梧桐子大每服五丸至七丸傷損

在上食後服傷損在下食前服日進二服

鼓雞散

水蛭

半兩炒

麝香

少許

半兩錢

十文醋蘸  
淬七次

金色

自然銅

半兩醋  
蘸淬

右為細末先以湯洗用竹木夾定後復服藥每用半  
字好酒調下多用則吐不受服藥約人行二十里則  
完常以鷄敲折頸骨畧與此藥治隔宿殺雞視之傷  
處如絲繞誠可信矣



接骨膏

烏魚骨

燒烟盡

木鼈子

去皮油一兩

白芨

錢一

白麝

一兩

右為細末新水調為膏攤夾紙上貼損處上用竹片夾定內服

乳香

沒藥

自然銅

各等分

古老銅

一錢燒赤醋淬七次

酥為度

右為細末每服二錢溫酒調下

# 接骨丹

純黃絲

一兩燒灰

虎骨

一兩燒存性

古銅錢

一兩火煨醋淬數十

次錢酥為度

鼈甲

一兩燒灰存性

右為末用淬錢醋煮糊為丸每一兩作二十四丸以朱砂為衣每服一九用熱酒嚼下隨病上下服之效

# 接骨藥

吳茱萸

官桂

厨屋內帛

用剪剪下勿令犯手

芥子

右等分為末以六錢煉蜜一兩為丸用生薑四兩搗

汁入無灰酒內化服須一時喫盡若作兩次喫在後  
必成攤節不平服藥後須忌飲酒一月仍以杉木夾  
縛即効

四骨散 治一切折了腿肱膊骨節

龍骨 虎骨 豹骨 穿山甲

右等分入乳香沒藥少許一處為細末用黃米麵糰  
攤在細稀稀布上藥末糝上先將折處理料的正却  
用藥貼在患處用火烤濕鹽一匝又用竹篩四下篩

住後用帶子或細索拴牢三五日看有不著處從頭再捏遍其藥貼上即時不疼十數日接住一方有乳香沒藥

治顛骨折傷方

麻皮糯米 黑豆 栗子

無栗殼亦得

右等分燒灰為末酒調服效

接骨散

百一選方

治打撲傷損折筋骨出者須要搗接骨

歸元位然後服此藥用半兩古文錢不拘多少以鐵

線貫之用鐵匣盛以炭火煨通紅盛好酒米醋各半升鐵鈴開匣取錢於酒醋口淬再淬盡去酒醋以溫水淘數多尤妙恐火毒不盡令患啞焙乾研極細入乳香沒藥水蛭等分同為細末每服半字或一字生薑自然汁調藥次用溫酒平服若不傷折即時嘔吐若傷折則藥徑下纏綴如金線絲如弓上之力神效驗初服忌酒三日一方無水蛭有麝香昔王丞相在東府時施此接骨藥極有效驗

草烏敷貼藥

草烏 萊豆粉 白膠香

右等分為末煎牛皮膠調藥攤紙上貼痛處

接骨藥

草烏末

一兩

吳茱萸

一兩

白麵

二兩炒

右為末和勻米醋脚調敷損處

沒藥自然銅散

出危氏方

治折骨傷筋痛不可忍

當歸

沒藥

各半錢

自然銅

一錢火煨醋淬為末又用水飛過

右為細末以酒調服仍以手摩痛處衍義云有人養折翅鷹飼以自然銅散遂飛去

神授散

一名接骨散  
一名鈎粉散

當歸

洗淨焙  
為末

鉛粉

各半  
兩

蓬砂

二錢

右研細末令勻濃煎蘇枋汁調服一大匕若損在腰以上先食淡麪半盞然後服藥在腰以下即先服後食仍頻頻呷蘇枋汁別作糯米粥入藥三錢拌勻攤紙上或絹上封裹傷處如骨碎則用竹木夾定損處

却以藥傅貼或衣物包之其妙如神內翰之子梓為  
豫州倉官嘗以治一庾人婁度當下黑血數升而安  
治跌折手足傅貼方跌傷先服前方神授散次用此方  
傅貼損處

麴

四兩

天南星

三兩半  
為末

生薑

四兩取  
汁同和

右先將杉木板夾定損處却以藥傅貼外用紗帛包  
裏內翰之子梓為豫州倉官嘗以治一庾人婁度其  
妙如神



小接骨散 治打撲閃肋損骨

牡蠣

一兩洗

青蛤粉

一兩

木鼈子仁

五錢

骨碎補散 治折骨

乳香

沒藥

各一錢半

骨碎補

一兩燎去皮

右為細末和勻分作三服用童便調下酒亦可外仍以後藥敷貼

正骨散 治傷折骨損疼痛主活血止痛正骨續筋

木賊

去節三兩

廣黃

一兩半

甘草

三兩

右為末每服五錢熱酒調下須先整骨夾端正然後服散亦可

接骨散 治傷折筋骨

木炭

半斤火燒醋蘸三度

白絲

三兩燒灰

自然銅

一兩火燒三度醋淬

研

右為細末每服一錢煎木瓜酒調病甚損傷折骨者服枰訖裹了次服沒藥丸

沒藥丸

沒藥

丹砂

研

牛膝

酒浸焙乾羅為末各一兩

右研勻麵糊丸如梧桐子大每服二十九丸木瓜湯下  
日一服午間服之五日後漸減丸數

烏金石散

治傷折骨

烏金石

穀精草

小地黃

右為細末用好陳醋加萊豆粉少許入銅器內熬成  
稀糊住火入藥末和勻稍添火熬滾隨時攤紙上患  
處貼之候患處覺冷其疼即止內損血不出者以銀

杏去殼好酒熱調服

乳香接骨散 治折骨條

肉桂

二兩去粗皮研

乳香

沒藥

為末各一兩

右拌勻用黃米煮稠粥量瘡大小剪紙花子攤粥在上然後將藥糝在粥上熱搭在瘡處如脚脛折把脚拽直用藥少頃不疼脚養時以水濕帛子漚乾裹著藥餅子上用熨斗火熨不養為度

接骨丹

茴香

錢一

五靈脂

兩一

右為細末另研乳香為細末於極痛處糝上用小黃米黃粥塗了後又用二味藥末糝於上再用帛子裹了用木楔子楔了少壯人二日効老者五六日効

敷貼方

木鼈子

七枚去殼研

自然銅

末二錢

右用生薑自然汁半盞麴五匙同研熬成膏攤紙上先用杉木節火煨草煎湯傾盆中將損處待熱氣熏

候溫洗之然後貼藥上散

神仙立效散 治骨頭內損接骨如神

半兩錢

自然銅

各等分

右各用火煨醋淬七次以酥為度去火毒為細末將患所折骨處用軟舊衣片或帶亦得襯裹外用杉木板一寸許活者數片周圍裹了外用帶縛須是實急得所太急則縛住血脈恐藥不行每用一字用生薑自然汁少許調在藥注內或手心內令患人服之即

用無灰酒一盞送下一服定疼二服接骨三服平復  
却更用本類後烏金散調理

治打撲傷損骨折

芥菜子

炒一兩

夜合樹

即合歡也去粗皮取白皮剉碎炒令黃微黑色四兩

右為細末酒調臨夜服粗渣罨瘡上扎縛定神效越  
州人謂之烏鰓樹一方葱白砂糖相等爛研傳之立  
止仍無癍痕

黃蘗散

一名白皮膏

治打撲傷損筋骨折及上跌撲疼痛

黃蘗

一斤

半夏

半斤

右為細末每用半兩生薑自然汁調如稀糊以鵝翎  
傳之用紙靨貼如乾再傳折先用絹帛封縛次用杉  
木扎定良久痛止即癢覺熱乃是血活即得筋骨復  
舊輕者三五日即愈重者不過旬月乾頻上薑汁尤  
佳蘇緯光云用全在生薑

接骨方

半兩錢

火十二文

麝香

少許



治顛傷折骨

鼠糞

糯米

炒黃色碾  
細為粉末

右用好醋調為膏以筭箬攤之貼下疼不可忍後即愈再貼

接骨丹

用頭髮一塊洗淨燒灰乳香好酒調下大効

接骨藥 不問骨節疼痛

用粟米熟鐵陳葱好醋同鉢內炒烟用碗覆之存性

外敷貼內喫

卓氏膏 療折跌腕蹻

以附子四枚生用去皮切以煉成豬脂一斤以三年  
苦酒漬三宿以脂膏煎三上三下膏成欲傅時以木  
七摩之或攤貼處日一易亦療卒中風口禁頸項強  
又方治顛骨折傷

用蘇枋槌碎常煎服或以童子小便或熱酒調麻皮  
灰服之皆良

烏金散 接骨

以黑豆二兩桑柴十根鋪黑豆再同以火燒候桑柴已過取二味灰為末次入麝香少許每服二錢酒調下

白膏子 治接骨

用牡蠣少許為末用糯米粥調塗其上即用杉木板夾即愈

治骨折及墜馬

用銅末調酒服之佳

接骨神効一字散

用蚶蜊蟲一名土鼈子一名異名生不拘多少用紙裹放鍋上焙乾為末每服一字好酒調下熱服亦可不可太多

續骨方

一名煨蔥方  
一名仁存方

魚治腦四肢骨碎及打傷瘀血

不止治指拇并爪甲因傷劈裂

用蔥一束布袋盛釜中懸煮熟取出截去根白以蔥

青衆手乘熱擘開內涎就於傷處頻貼以骨接不痛  
為度如骨碎難接用糯米粉熟湯搜和成餅乳香摻  
之加盞上方煨透乘熱搥葱碎貼患處一方炒熟罨  
傷處

### 接骨方

以芷可作草屨者以刀近根割去待其長新生者割  
収之焙乾為末或擣傳之以軟帛扎定効

### 治顛骨折傷方

用生韭自然汁服碗許其惡血從大便中下

治折骨

用水蛭新瓦上焙乾為細末熱酒調下半錢食頃痛  
可再服痛止便將折骨藥封次以物夾定直候至効  
療凡脫折 折骨諸瘡腫者或當風或多用扇中風發  
瘥口禁頭項強身中急痛者

用竹瀝飲三二升若已口禁者以物發內之忌冷飲  
及酒竹瀝卒燒難得可合東十許枝併燒中央兩頭

承取収之

療骨折 接令如故不限人畜

取古鑄

上柯魯切下母郎切溫器也

銅錯取末擣以絹篩和少酒

服之亦可食物和服之不過兩方寸匕以來任意斟酌之

治四肢碎破及筋傷蹉跌方

用生魚熟擣以敷折上日三易又方生鼈熟搗傳折上日三易

又方

取活鼠破其腹背及熱以傅之愈又去鼠五藏傅之良一方熟搗以敷折上日三易

凡跌撲傷損骨者

用黃牛角炙焦刮去末須去焦者取二錢以好酒調下上損食後服下損食前服左傷用左角右傷用右角此法因同老王千戶在餘干州鎮平以箭射折周霸都腿即以此藥服之三五次接上完復子目見之



後用果効

接骨方

用豆粉炒將葱白生薑搗爛再同於銚內炒熟敷冷則換

跌折肢體并顛撲損傷筋骨折者

以肥皂炒枯為末用旋煮糯米糕同搗為膏子敷貼患處以杉木片綁縛仍酒調肥皂末一捻許咽下即時接上

治傷出腸肚在外不破不傷肚者

以鍼穿桑根白皮縫合其患可痊如無桑白皮用絲線縫合亦得也如不入以手剥肋腸自入也

又方

治人頭骨斷不傷氣喉食喉外隨時用物繫住用正  
三二日其骨自接仍隨證以藥治之

治跌骨斷

用白及一味為末酒調服神効又云其功不減自然

銅與五銖錢

接骨丹 治癰撲傷折

錢

五十文炭火煨醋淬碎半兩

乳香

半兩透明者

五靈脂

半兩

羊脰骨炭

半兩

右為末每服半錢蜜調成膏以酒化開服之次喫獨  
栗三兩箇止可一服次進烏金散

烏金散 傷折接骨如神

桑白皮

一兩焙剉

獨栗連殼

切焙一兩炒

自然銅

一兩煨淬

研

羊脛炭二

兩

右為末每服二錢無灰酒調下日三服傷折在上食後服在下食前服

止痛方

乳香

沒藥

鹽炒

當歸

火煨

紫金皮

醋炒

白芷

劉寄奴 黑牽牛

右等分依前大接骨方煨製傷痛不止者先服此即止

又方

麻黃

三兩內去一兩節

甘草

三錢

右為末每服五錢匕整骨了熱酒下令醉

補骨脂丸 接骨止痛生肌肉續筋脉

補骨脂

炒香

乳香

別研

自然銅

燒紅酒淬七遍

石亭脂

別研

續斷

酒浸

木鼈

去殼取肉別研上六味

烏雄雞

一隻去毛

皮腸肚內皆不用只取血并骨入藥

烏鼈

一枚剗去腸胃如無只使鼈甲代之亦可也

右件鼈或鼈甲和雞血骨就砧上剝爛令極細烈焙

乾為末料與前藥末等分拌和勻酒煮麵糊為丸如  
梧桐子大每服五十九加至一百丸溫酒鹽湯任下  
不拘時候

又方

乳香 沒藥 蘇木 川芎 當歸 血竭 赤  
小豆 石南藤 紫金皮 小含笑花葉 白茅  
根

又縛傳藥

南星 黃蘗皮 赤小豆

右用薑黃末生薑汁調傳

又方 治骨折

敗龜版

一箇百孔已上不  
妨火煨白為度

生薑

肥大者  
自然汁

右碾龜殼為末入乳香勻用藥末一合浸少時煮粥  
研細入薑汁更研方用前藥兩匙入研勻再於瓦內  
蒸令極熱上骨折處仍先用葱湯洗令骨內熱筋骨  
活絡方可敷之候乾再換三五度即瘥

又方

用苧根竹根切片無灰酒一盞整骨了日進三服

又方

用雄蟹殼不拘多少用水蛭去兩頭尖同蟹殼炒焦黃盡去水蛭研殼為末熱酒調連盡三服畢喫白湯飢餓一碗不用鹽不問寒暑被蓋取汗為度

又方

用木鼈子肉細磨水調抹之



彭氏黑龍散 治傷損筋骨碎斷差文每用先洗葱湯

藥水淋洗整拔平正看熱令用薑汁或紙或帛隨大小裹貼有破留口別用飲藥如骨斷碎斟酌夾縛三日一次淋洗換藥不可去夾以待骨續如刀箭獸齧成瘡壞爛擦踐腫痛用薑汁和水調貼有破留口

川山甲

六兩

丁皮

六兩

當歸

二兩

百草霜 枇杷

葉

畧用皆一字

右為細末薑汁和水調貼

又方

用川烏一箇先將好臘糟入紫油缸內次用糟盪了  
蓋定有患取此川烏如梧桐子大用飯三五粒為丸  
冷水下糟抹患處

桃紅散

出永類  
鈴方

貼傷折筋骨腫痛

草烏

三箇去皮見  
血者不可用

飛羅麴

半斤

國丹

三錢

貝母

半兩

天南星

半兩

右為細末生薑自然汁調貼如作潮熱茶清調貼如

皮破見血者去草烏恐壞皮肉若輕者血聚以蘿蔔  
藥研罨患處帛縛之

治胃脇諸骨傷斷

出永類  
鈴方

右以黃雲膏木菖蒲炒常紅用內消如腫加生者五  
兩即何首烏白芷生用風加一兩赤芍藥生二兩痛  
亦加土獨活生三兩常用為末溫熱酒調塗

諸損敷貼

出永類  
鈴方

當歸

三兩

白芷

三兩

肉桂

半兩

薰陸香

沒藥

各一

兩

右為末薑汁調白芷一味自佳

歐陽氏貼損

出永類  
鈐方

白芷 赤芍藥 南星 天花粉 木臘葉 牡

丹皮

少許

右為末薑汁調貼

彭氏風流散

出永類  
鈐方

石膏

十箇泥固  
濟火煨

白礬

飛二兩

枇杷葉

少許

松脂

黃

丹各一兩

右為末傷經久者藥水洗後用瘡乾用油調傳新破

傷忌風濕

治損折骨活血住痛虛弱及經久未安

出永類  
鈴方

附子八分

澤蘭

一兩

川椒

去目及第二重  
皮炒半兩放冷

甘

草半兩

當歸

川芎

獨活

各半兩

白芷

一兩

川

烏八錢

右為細末細嚼生薑酒調如刀傷不用酒骨斷皮不

破加乳沒浸酒調體弱傷損氣痛茴香薑酒調看虛  
實每服加少烏末腦上有傷頭痛不止荊芥川芎各  
半兩白芷一兩華澄茄二錢為末熱酒調

治傷損筋折骨先用趁痛散止痛

出永類  
鈴方

川獨活

川五靈脂

別研

乳香

別研

白芷

北茴

香

各一兩

防風

百草霜

沒藥

各半兩

淨生地

黃

二兩半

赤芍藥

二兩

杜白芷

三兩

桔梗

草烏

二錢小麥汁煮  
透去皮尖焙

右為細末每一大錢煨蔥頭或炒松節薑酒調下

接骨散

出永類  
鈴方

治諸傷筋折腫痛服之住痛消腫

白芍藥

二兩

破故紙

炒一兩

自然銅

醋淬

沒藥

別研

羊脰骨炭

各一兩

白茯苓

骨碎補

去皮各一兩

川

烏炮

木鼈

去殼并油煨各半兩

虎骨

隨多少醋煮別研

右為末每一大錢依前湯使調下燒羊脰骨炭法四

五月收麻羊糞用茆一層又加糞一層盡意燒之存

性合了煙令作炭先辦薑汁童便候炭成將入汁內

淬曬乾為末

筋骨散

出永類  
鈴方

治新舊損除痛壯筋骨

生地黄 赤芍藥 當歸 石南藤 各二兩 杜白

芷 骨碎補 炒去毛 各三兩 五靈脂 肉桂 山桂皮

荊芥穗 各一兩 桔梗 四兩 川烏 雄黑豆 煮去皮 四兩

兩 草烏 製半兩

右為末薑汁和酒調婦人風損痺痛煨葱酒調下

接骨續筋住痛生血周心竹傳甚神祕之內加玉真散二



味又勝諸方

出永類  
鈴方

乳香

沒藥

自然銅

醋淬  
七次

南木香

生地黃

熟地黃

川羌活

川芎

當歸

防風

南

星

松嫩心

去皮

粉

側柏葉

醋煮加  
倍用

草烏

數  
箇

製去皮尖痛  
加作五七箇

柘木

大中煨存  
性作炭

右前藥各等分側柏柘炭加一倍用細末生薑自然

汁調下或蜜丸如彈子大生薑和酒調細嚼之

神效接骨丹

出衛生  
寶鑑

治男子婦人老幼筋折骨撲損

及治寒濕脚腿疼或一切惡瘡疼痛不止

南乳香

沒藥

南白膠

蜜陀僧

四兩另研

香白

芷

紅豆

大豆

赤芍藥

當歸

水洗三遍

瓜子

仁

水蛭

已上等分

自然銅

火燒過令通紅醋淬紅燒如銀為度用之

右為細末黃蠟為丸如彈子大每服一丸用黃米酒

一盞煎開和滓溫服年少者又一服老者加添服病

在上食後病在下食前此藥內自然銅水蛭瓜子加

桂花川練子茴香為細末酒麴為丸如桐子大每服

十五酸石榴湯送下食前日進二服治小腸如神一切臍腹疼痛並皆治之此藥功效不可具述

神仙透骨丹

出永類  
鈴方

骨斷八分可用此藥

當歸

四兩

川獨活

三兩

乳香

白膠

半兩  
製生熟地黃  
過用

各一兩

自然銅

醋淬  
半兩

側柏葉

四兩  
蒸焙  
酒

肉桂

半兩

石南藤

二兩

右為細末糯米糊彈子大國丹為衣每一丸炒松節或番降節酒下看損上下服亦可如梧桐子大每三

十九藥加松條節好土珠荊芥桔梗各二兩脚氣入骨痛木瓜浸酒黑豆炒烟起浸酒

小紅丸

出永類  
鈐方

治諸傷勞損踈折筋骨風濕攣拳

壯筋骨活經絡生氣血

川烏 何首烏 蒼朮 蛇牀子 五靈脂 白

膠香 赤小豆 牛膝 當歸

各製淨  
一兩

乳香 二錢

酒糊丸如菉豆大每服三十丸酒下

大紅丸

出永類  
鈐方

治證同上不問新舊經年諸損傷孕

婦勿服

赤白芍藥

無用一斤

何首烏

一斤焙

川烏頭

一斤七兩炮

當歸

七兩

骨碎補

麥製一斤

牛膝

十兩

淨北細辛

八兩

青桑灰

三斤或不用

赤小豆

二升

自然銅

二兩醋淬

細末醋丸梧子大信州朱為衣每服二十九丸溫酒下

黑神丸

出永類  
鈴方

治證同上

白斂

一斤

白及

四兩

當歸

四兩

白芍藥

剉

南星

六兩

川烏

三兩

骨碎補

製八兩

牛膝

九兩

百草霜

半  
兩 赤小豆  
升

右為末醋糊丸如桐子大湯使同上一方加細辛或

白鮮皮

接骨散

選出百一  
方

治折傷

黃狗頭骨

一箇湯去毛便以泥皮  
去之炭煨過去泥為末

官桂末 牡

蠣

亦泥固  
火煨

右三味各為細末每用狗頭末五錢入牡蠣末三錢

桂末二錢並抄以糯米粥鋪絹帛上糝藥在粥上裹

損傷處大段折傷者上更以竹片夾之少時即痒不可抓之輕以手拍三兩日效

治四肢骨破及筋傷蹉跌及跣折

出本草

以水二升豉三升漬之攪取汁飲之及止心悶

治腕折骨痛不可忍

出本草

用火麻根及葉搗取汁三升飲之非時即煮乾麻汁

服亦同主搗打瘀血心腹滿氣短皆効

麻根即今人續布麻種子

也

療骨

出本草

取虎頭為末水服方寸匕

治筋骨疼痛

出本草

用馬接脚皮并續筋金稜藤三味洗淨去麕皮焙乾  
等分搗羅為末溫酒調服二錢匕續筋即菑旋根也

普濟方卷三百九